


Minister di Cultura Otmar Oduber

"Lo bay crea un raad di cultura pa supervisa preparacion y implementacion di maneho di cultura"



ORANJETSAD (AAN): Minister di Cultura Otmar Oduber a continua cu su bishitanan na organizacionnan cu ta resorta bou di Ministerio di Cultura, pa asina conoce un poco mas di e meta di cada un instancia y duna inicio na un proceso di consulta cu tur stakeholder relevante cu mester desemboca den un plan integral di maneho di cultura.

Dialuna merdia Minister Oduber a reuni cu Fundacion Desaroyo Educativo Comunitario (FDEC), Union di Organizacionnan Cultural Arubano (UNOCA) y Cas di Cultura unda cu cada un di e organizacionnan aki a duna e mandatario un presentacion di nan meta, vision y plannan. E mandatario ta indica un punto cardinal cu a resalta despues di a conversa cu cada un di e organizacionnan, esta cu lo mester duna mas atencion na sincronisacion di un maneho di cultura na Aruba. Esaki lo mester sali for di Departamento di Cultura (DCA) cu lo mester bay crea un raad di cultura riba un nivel nacional cu e tarea principal pa percura pa coordinacion di maneho di cultura y estructuracion di comunicacion entre tur e diferente organizacionnan, instancianan y museonan cu ta resorta bou di Ministerio di Cultura.

Hopi biaha Gobierno ta presupuesta y contribui financieramente na cada un di e organizacionnan aki, pero un di e problemanan ta cu hopi biaha trabaonan ta worde haci double pa un of mas organizacion y instancia, enbes cu esakinan ta traha hunto.

Minister di cultura ta haya hopi importante pa introduci un maneho di cultura transparente, pa cada un di e instancianan aki cu ta haya subsidio di Gobierno por traha cu bista den e mes un direccion.

Cada un di e gruponan cu e mandatario a reuni cu nan, a reconoce e hecho cu hopi biaha ta wak kico ta pasa y tin cu pasa paden di cas (internamente) y esaki ta trece cu ne cu no tin un plan macro cu ta acapara tur e idea y trabaonan, locual lo crea un sistema mucho mas beneficioso pa tur instancia, DCA y Ministerio di Cultura.

Minister Oduber ta splica tambe cu e aña venidero lo crea un plataforma di maneho pa cultura y cu intencion ta pa mas pronto posibel organiza un dialogo nacional di cultura. Esaki ta necesario pa entre otro por saca afor kico tur cultura di

Aruba ta encera, con por crea sinergia entre cultura y educacion y mira con por amplia esaki den cada materia y disciplina cultural.

Minister Otmar Oduber a keda hopi satisfecho cu presentacion di cada un di e instancianan y a expresa su deseo pa crea un plataforma pa asina por traha hopi di cerca cu cada un instancia, organizacion of museo cu e meta comun pa eleva e calidad di cultura di Aruba.